

AKABUTO





Ku gasozi ka Karenge mu misozi ya Bisesero havukaga Umurisa akaba umuhererezi mu muryango wa Karekezi. Umurisa yakundaga guherekeza Nyina mu murima mu gihe cy'ihinga.





Umurisa yakundaga ubutaka ni uko agahora atera imbuto
mu karima k'igikoni Se yari yarahinze mu gikari.





Umurisa kandi yakundaga kuja kureba uko imyaka ikura mu mirima y'abaturanyi. Yanezezwaga no kureba izuba riranga yicaye mu mirima ya Kaneza wari inshuti y'akadasohoka ya Nyina. Iyo izuba ryamaraga kurenga, yafumyagamo akiruka ngo atarenze amasaha yabaga yahawe.






Umurisa uwo yari umuhanga rwose kandi yari ategerezaniye amatsiko gutangira ishuri. Nyamara Se na Nyina bo bashakaga ko ahama mu rugo ngo ajye abafasha uturimo two mu rugo.



Bukeye Karake musaza we yicaza ababyeyi be aterura amagambo ati: “Babyeyi beza, mbese ntimuzi ko umwana w’umukobwa afite uburenganzira bungana n’ubwa musaza we?”

Ni uko abasobanurira uburyo umwana w’umukobwa akwiye gushyirwa mu ishuri ndetse ku gihe. Umwaka w’amashuri wakurikiyeho, ubwo Umurisa yari yujuje imyaka irindwi, nawe yashyizwe mu ishuri.

Umurisa ageze mu ishuri yize ashyizeho umwete, agakunda gusoma ndetse no gushushanya. Aho yahuriraga n'igitabo hose yifuzaga kugisoma ariko by'umwihariko agakunda iby'amateka n'ubumenyi bw'isi.





Yarize ndetse agera mu cyiciro cya kaminuza aho yize ibijyanye n'ubuhinzi. Yigaga muri kaminuza y'u Rwanda ishami ry'i Busogo.






Uko yarushagaho kumenya byinshi niko yakumburaga iwabo ndetse agahorana amashyushyu yo gusubirayo nyuma yo gusoza amasomo ye.






Nyuma y'imyaka ine, Umurisa yasoje amashuri ye maze asubira iwabo i Karenge. Yasanze ibintu byarahindutse. Inkwi zari zarabuze, amashyamba yarashize, abantu barakennye ndetse abana barishwe n'imirire mibi.






Umurisa yahise yiyemeza gufasha abo yasanze. Abigisha gutera ibiti, guhinga kiyambere ndetse no gukoresha imbuto z'indobanure. Ababyeyi b'i Karenge batangira kweza, bakabona iby'ingo zabo ndetse bagasagurira amasoko. Barizigamira, bikura mu bukene maze batera imbere.



Ibijyanye n'imirire nabyo ntiyabyibagiwe. Yabigishije guteka indyo yuzuye maze abana bari baragwingiye barazanzamuka.



Uko iminsi yicumaga, bya bita byarakuraga maze biza kuvamo amashyamba ni uko imvura yongera kuboneka maze umunezero utaha i Karenge. Ni uko inyo nkuru yamamara mu Bisesero hose.



Umurisa yabaye icyamamare kugeza ubwo yahawe igihembo gikomeye ku isi ndetse ahabwa n'umudari w'ishimwe na Nyakubahwa Perezida wa Repubulika. Maze mu ijambo rye ashyikirizwa uwo mudari abwira abari aho bose ati: "Ni uko namwe mutere ibiti."



